

# Emily Hobhouse kaleidoskoop

Joan Hambidge<sup>1</sup>

## Emily Hobhouse in 'n ongeposte brief aan Tibbie Steyn:

Vir Hans du Plessis

Ek dank jou  
vir jou warm brief  
uit die Verre Vrystaat

met biltong,  
ingelegde vrugte,  
flertsies groen kweper,  
'n klein karmenaadjie  
my toegesend.

Ek proe my  
aangename land  
in 'n toegetrekte keel:  
sien vroue  
wat weef en spin  
in 'n verre Phillipolis...

O Tibbie,  
hier is ek 'n rebel,  
'n leuenaar,  
'n vyand van my mense...

Maar ek weet:  
eendag sal my gees  
weer sweef  
oor die wye velde  
van my Troue Land.

Hoe graag sou ek nie  
by die monument  
wou klaag?  
My dank vir die voordrag,  
die lees van my brief:  
vir die wonde wat jy, Tibbie,  
só selfloos,  
ón-stoets,  
namens my dra.

## Emily Hobhouse, 'n selfgesprek

Heer Kitchener, Heer Milner,  
weet u hoe die oorlog ruik?  
Mag ek u vertel, meedeel  
van die ellendes daaglik uitgedeel  
soos stinkende kospakkies? Hoe 'n vader sonder  
steun sy kind se uitvaart moet aanskou?

Heer Kitchener, Heer Milner,  
weet u hoe die oorlog klink?  
Hoe 'n moeder vir dae sonder trane  
'n lyk op haar skoot hou,  
'n woordelose wiegelied?  
Op Springfontein word 'n jong vrou  
in 'n grynsak ter aarde beklank.

Heer Kitchener, Heer Milner,  
weet u hoe die oorlog proe?  
Die rens melk, die vleis vrot,  
skifsels meel langs vlieë en luise,  
luise en vlieë, en vlieë, en nogmaals vlieë,  
digby grafte soos gapende wonde.

Heer Kitchener, Heer Milner,  
vandag het 'n baba van drie maande gesterf.  
En op hierdie dag, die hereweet,  
nog twee ander...  
Vir die vaders, vegtend tot die bitterend,  
'n swart-en-wit-kiekie  
die enigste nalatenskap...

Heer Kitchener, Heer Milner,  
ek sien die wit blom  
in die hand  
van 'n kind, stóm.

Heer Kitchener, Heer Milner,  
hoor my, hoor my aan.

### Read online:



Scan this QR  
code with your  
smart phone or  
mobile device  
to read online.

**Affiliation:** <sup>1</sup>Department of Afrikaans Literature and Creative Writing, University of Cape Town, South Africa

**Email:** joan.hambidge@uct.ac.za

**Postal address:** Private Bag X3, Rondebosch 7701, South Africa

**How to cite this article:** Hambidge, J., 2013, 'Emily Hobhouse kaleidoskoop', *Literator* 34(2), Art. #1040, 1 page. <http://dx.doi.org/10.4102/lit.v34i2.1040>

**Note:** The poems in this Litera contribution also appeared in LitNet.

**Copyright:** © 2013. The Authors. Licensee: AOSIS OpenJournals. This work is licensed under the Creative Commons Attribution License.